



Inatsisartunut ilaasortamut
Marianne Paviaasen
Inuit Ataqatigiit

23-11-2023
Suliap nr. 2023 - 27102

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: asn@nanoq.gl
www.naalakkersuisut.gl

Uranimut inatsisip saqqummiunneqarnera pillugu § 37 naapertorlugu apeqquteqaammut nr. 154-2023-mut akissut

Inatsisartut suleriaasianni § 37, imm. 1 naapertorlugu apeqqutit matuma kingulianiittut Naalakkersuisunut saqqummiuppatit, taakkualu matumani akissuteqarfigineqarput.

Apeqqut 1:

Naalakkersuisut 2021-mi uranimik il.il. misissueqqaarnernik, ujarlernernik qalluinernullu inerteqquteqalernissaq siunnersuutigaat. Naalakkersuisut suliap ingerlasimaneranik saqqummiussisinnaappat.

- A) Naalakkersuisut Inatsisartullu akornanni suliaq qanga ingerlanneqarpa?**
- B) Naalakkersuisut Inatsisartullu akornanni suliaq qanoq ingerlanneqarpa?**
- C) Naalakkersuisut piaaralutik paasissutissanik Inatsisartunut ilaasortanut isertuussisimappat?**

Apeqqummut 1-imut akissut:

A) pillugu

Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisaannut siunnersuummut missingiut Inatsisartut Inuussutissarsiornermut Aatsitassanullu Ataatsimiititaliaannut ulloq 30. juni 2021 saqqummiunneqarpoq. Tamatuma kingorna inatsisissatut siunnersuut, Inatsisartuni inatsisissatut siunnersuutit saqqummiunneqartarnerannut akuerineqartarnerannullu suleriaatsit nalinginnaasut, malillugit ingerlanneqarpoq.

- Siunnersuut ulloq 17. september 2021 Inatsisartunut nassiunneqarpoq.
- Siunnersuut ulloq 5. oktober 2021 Inatsisartuni siullermeerneqarpoq aammalu Inuussutissarsiornermut Aatsitassanullu Ataatsimiititaliamut suliassanngortinneqarluni.
- Naalakkersuisut Inuussutissarsiornermut Aatsitassanullu Ataatsimiititaliap apeqqutai ulloq 11. oktober 2021 tiguai.
- Ataatsimiititaliaq ulloq 18. oktober 2021 ilassutaasunik apeqqutinik nassiussivoq.
- Naalakkersuisut Ataatsimiititaliap apeqqutai ulloq 22. oktober 2021 akissuteqarfigaat.

- Aammattaaq Inuussutissarsiornermut Aatsitassanullu Ataatsimiititaliaq, kiisalu Naleraq aamma Demokraatit aallartitai aammalu Naalagaaffiup eqqartuussissuserisua ulloq 22. oktober 2021 ataatsimeeqatigineqarput.
- Naalakkersuisut ulloq 30. oktober 2021 aappassaanneerinissamut ataatsimiititaliap isumaliutissiissutaa tiguaat.
- Naalakkersuisut ulloq 1. november 2021 Inatsisartunut akissuteqaat nassiuppaat.
- Siunnersuut ulloq 2. november 2021 Inatsisartuni aappassaanneerineqarpoq.
- Naalakkersuisut siunnersuummut ilassutitut isumaliutissiissut ulloq 6. november 2021 tiguaat. Ilassutitut isumaliutissiissummi siunnersuummut allannguutissatut siunnersuutit marluk nassuiarneqarput. Allannguutissatut siunnersuut siulleg ataatsimiititaliami ikinnerussuteqartunit, Atassummeersunit, saqqummiunneqarpoq. Allannguutissatut siunnersuutip aappaa ataatsimiititaliami amerlanerussuteqartunit Siumumeersunit aamma Atassummeersunit, saqqummiunneqarpoq.
- Naalakkersuisut akissuteqaat Inatsisartut ulloq 8. november 2021 Inatsisartunut nassiuppaat.
- Siunnersuut ulloq 9. november 2021 pingajussaanneerineqarlunilu akuerineqarpoq.

B) pillugu

Ataani atsiortoq isumaqarpoq suleqatigiinneq ataqqinnittumik aammalu qulequttap politikikkut sammineqarnera ajornakusoortuusoq paasinnittumik, ingerlasimasoq, tassami inatsisissatut siunnersuutip siunertaa politikikkut isumaqatigiissutigineqanngimmat. Naalakkersuisut inatsisissatut siunnersuutip tamanut ammasumik tusarniaassutigalugu nassiunneqannginnerani Inatsisartut Inuussutissarsiornermut Aatsitassanullu Ataatsimiititaliaat paasissutissiivigereerpaat. Tamatuma saniatigut Naalakkersuisut ataatsimiititaliap apeqqutai akissuteqarfivereerpaat aammalu ataatsimiititaliap ernumassutai siunnersuutaallu tusaallugit. Aallaqqaataaniilli ersarippoq siunnersuutip atituumik politikikkut tapersorsorneqarnissaa anguneqarsinnaanngitsoq. Tamanna Inatsisartuni oqallinnerit nalaanni oqaluttarfimmiit akuersarneqarpoq. Allatigut aamma takukkit matuma siuliani A)-p ataaniittut.

C) pillugu

Naalakkersuisut paasissutissanik Inatsisartunut ilaasortanut isertuussisimangillat. 2022-mut naatsorsuutit suliarineqarnerisa nalaanni Inatsisartut Kukkunersiuinermut Ataatsimiititaliaat uranimut inatsisip akuerineqarnissaata tungaanut ingerlasimanerata nassuiarneqarnissaanik kissaateqarpoq, ilanngullugu Inatsisartut uranimut inatsisip sunniutissai aammalu Namminersorlutik Oqartussat taarsiinissamik akisussaatinniarsarineqarsinnaanerisa aarlerinaateqarnera pillugit paasissutissanik attuumassutilinnik tamaginnik pissarsisimanersut. Naalakkersuisut 2024-mi upernaakkut nassuiaat taanna tunniussinnaassallugu naatsorsuutigaat, tamatumalu kingorna immikkoortoq taanna annertunerusumik itisiliiffigisinnaassallugu.

Inussiarnersumik inuulluaqqusillunga


Naaja H. Nathanielsen